

赤城集

赤

城^{十三}

集

函

第三十四卷

赤城集卷之六

州學建武齋記

方 畧

上嗣位之六年夏五月近臣有抗章於朝其略曰國家
留意人才文武並用故有太學有武學今州郡莫不有
學起居飲食月書季考惟文士耳習武舉者一無所豫
甚失國家並用文武之意乞諸路提學詔所屬郡庠增
闢一二齋兼養武舉之士上可其奏惟臨海郡學建置
日久淳熙壬寅郡守大著唐公更加繕造儀門外兩廡
東則宗學西則縣學後又由縣學之左剏經武一齋尋
廢今郡侯遵奉明詔屬有司相厥攸居於是卽經武之

舊廬拓旁吏舍而廣之設爲二齋左曰備文右曰輔德
又於教官廨舍後隙地闢射圃締亭其上榜曰立德蓋
亦循其故址而甬築蔭茨焉會秋仲月諸生應補者五
十餘人采其文理之優者聽入月書季攷一如造士之
法講肄射藝旬日亦有常程州郡選戎官之精貫武技
者爲之訓導給民沒官之閒田以資其廩餼於戲休哉
甚厚意也諸生合辭請謂不可無志矐不獲辭竊嘗誦
詩魯頌泮水有獻馘獻功等事然後知古之學校不專
爲教化絃誦地而武畧兵戎之罔不寓是爰自漢武帝
求文武如不及唐長安中始置武舉與進士明經並行

然董仲舒興太學之請唐六館之目至不一而爲習兵
書者設蓋蔑却也惟我高宗南渡中興時則兩學並建
繇是文武長材彬彬輩出若乃郡國自慶厯興學距今
一百五十八年儒風日以寢盛而武勇智略之士散居
田野三載大比僅或自拔以著見獨平時肄業講習之
所闕然不聞可謂闕典今日崇尚右序風被四方旣以
教養作成之事附麗於禮義之宮益使太公孫吳之術
是班於孔孟之道士心改觀爭自激昂奮發功名相勉
忠義然則儲養於無事與夫握土於倉卒豈可同日論
哉吾聞是邦山明水秀魁壘之英忠鯁之賢公輔之彥

師帥之才聞人顯士繇鄉校出代不乏人紹興甲戌庚辰僊居鮑氏兄弟首相繼以武舉擢乾道初又有自右科易進士第而後爲名卿賢方伯者自是聯肩接踵腰金紆紫項背相望然終未若文雅閎博之士光明俊偉之盛今郡侯仁賢推廣德意加惠多士爾游於斯泳於斯旣乃心精乃藝毋荒於嬉毋自鄙夷於詩書禮樂自命於勲業遠大自期詩曰髦士攸宜又曰蹻蹻王之造抑俾熙朝文武得人如周家之盛庶無負聖天子樂育之意

州學教授題名記

王謙之

聖王建置學校長育人材所以續天地生生之大德也
藝祖受命承五代干戈之餘綱紀初基日不暇給而臨
幸監學再舉講典尊師重道有光古昔閱時未久申命
近臣聚生徒講學以風四方規模遠矣列聖遵守家法
有隆無替接於慶厯遂詔天下皆立學置學官之員而
教養之制加焉夫培植涵養於平居未用之時將憑藉
扶持以爲子孫數百世之用則所謂教者豈特月書季
考而已哉今學官在郡縣中雖無羣有司簿書期會斷
獄聽訟之冗然所任之重視羣有司何如也議者顧以
爲□□□□之若安知祖宗建官立學之本意哉天台

爲浙下州而人物之盛出爲名卿才大夫者項背相望
此非一朝一夕之故也蓋自建學以迄於今作人之功至
矣爲學官者不知幾何人顧使其姓名不傳於後豈非
大闕予因博稽記籍之傳參以故老耳目之所信其所
可見者才得二十有八人先此皆與歲月俱遠而無考
失今不識歲月且益遠凡今之可見者又將泯矣予甚
懼焉悉取而載諸石雖到罷月日間有未詳然書其姓
名於上使後之人或因姓名而考得失庶居是官者有
以自警而不敢忽則題名之設尚有補於世教云

台州新給贍學田記

俞建

嘉泰改元春正月括蒼吳侯繇戎監簿分丹邱銅虎始
至欵謁學宮進諸生而諭之曰台嶽神秀之區蟠粹鍾
緼挺生宗工碩輔以隆道峻德調元巖廟實闔帝賚崧
高之祥爲是邦圭袞盛事洎名卿鉅儒魁壘正大彬彬
輩出迺至擢第太常策勲壁水聲價尤擅一時人物彙
征林立號東州冠竭來親挹簪弁閭閻秩秩詎非幸與
顧淬業於學凡幾庠廩所儲奚若士歷階具對比歲絃
詠日蕃貲聚采畱豐年董董弗瞻小遇早潦搏手莫支
藿鹽蕭涼韋布瑟縮非一日積侯慨然動色曰若是寧
不於多士歎繼粟育才責不余在而疇諉會帑吏以敗

聞聽其歸田於官厥壤豐腴境臨海之保樂豪宗環睨
競覬顧疆畝適與故學田綜錯晦計者百有四緡計者
九百四十有六斛計者二百三十有七侯喜謂建曰是
不足爲吾泮助耶吏白帑失贏會直僅償委焉懼闕公
計侯斥言郡國教養宜急捐以予士不猶愈乾沒汝曹
手吾帑縱乏樽縮奚病矧飭厨傳稱過客匪性所樂抑
不暇已約彼裕此余志斯愜尚安靳趣割券畀學別駕
復從臾之劍佩聞風踴躍起敬懽言牧伯主盟庠校累
累毋乏大抵稍繕土木卽推殊尤甚或而勉應銳出衷
懷實鮮施予儉束廩給靡聞孰饒植人才惻怛加惠若

侯勇且亟者歲獲常入粟有羨儲繼今一飲一食皆笑
賜也屬馱將奚窮始謀肖像揭虔侯卻弗許乃合辭屬
建識顛末以詔後不得辭嗚呼謀食求飽士之恥也豐
餽養士上之禮也禮明則化行化行則俗成洵觀州邑
棘利紓義右政左教籌筭榜笞日接耳目視詩書俎豆
若將浼已惟吳侯學以傳家材以經世飭吏事以儒雅
主治道以清靜孜孜風化嘉與培植是舉也君子謂立
政知先矣夫出研桑之私智而能急衆所緩一宜書恥
徇已以自豐推而俾寒素蒙其利二宜書休績創睹前
罔倫擬三宜書雖然侯之飫爾士誠渥矣勵志賈勇毋

但徼功名之歧嚙嚙涵泳益鞭其未至以叩聖賢之藩
級諸生誠知此歟侯意斯無負而侯之德度乎其愈侈
哉侯名英雋崇寧間以中書舍人知制誥者其再世祖
也

台州增學田記

應椿年

淳熙四年歲在丁酉冬十有二月濮城李公被命來守
眎事纔三日謁於我先聖祠下禮畢陞堂延見諸生顧
瞻兩序冠帶聯屬謂椿年曰是邦上應台躔儲精孕秀
名士代不乏人學校彬彬也固宜他日問學中人才且
及經費椿年於是言在籍之士不啻數百人而食於學

者未嘗滿百一歲之入不足以充費典教者以敦學之
餘錙銖計之少不經意則用之闕也滋甚故有願處學
而不得者公聞之矍然曰是豈養育成就之道哉當思
有以附益之他日又語椿年曰學用之不足未有以爲
計近謂諸好義者得黃岳黃氏田五十畝寧海士人陳
公輔田二十畝臨海將仕郎朱鳳田十五畝爲穀二百
石有奇縣覈其實而歸之學吾方以義勸人其知慕名
教而來從者殆未已也子其謂何退語諸生雜然相賀
遂請記之椿年愚不肖尸教事愧不能作爲文詞侈公
之賜竊惟今海內郡縣莫不有學其間或患不足者特

上之人無術以濟之耳昔唐劉賓客刺夔州嘗有言曰
今之膠庠不聞絃歌而室廬圯廢生徒衰少非學官不
振病無貲以給也其說固當矣然其議謂春秋上丁有
事孔子廟其禮不應古乃計本州四縣一歲釋奠物之
直緡錢十六萬舉天下郡縣歲凡費四千萬請罷牲牢
衣幣籍其資半歸國庠爲築室器用簞食之需畱其半
益州家學校之用計則未爲得也今我公明號令一政
教糾察奸欺督勵風俗曾未期年上下懽服故能以義
感民而民以義從不勞指麾千里之內士皆受賜較其
成效異乎損上下之儀以爲食者矣異日此邦之士樂

就菁莪之育而多爲聞人實基於此公名質字文叔明
陵賢相文定公四世孫家傳儒學公之政汲汲於學
如此源流蓋有自來矣是用特書以詔於後嗣有附
尙當屢書之云

增學田記

陳耆卿

古之善爲政者以養士爲先善養士者以尊禮校官爲
急校官無簿書期會可以賈知而沐尊禮也然所職乃
教化則有出於簿書期會之上者焉教化所以養士之
心徒曰養其心而不養其口體亦偏也要自口體以上
充而進之爾然則士無田而校官無宅毋乃不可乎按

州經田自三舍法罷留不能及頃南渡後凡幾增廩而
其入止一千八百石有奇以故月俸日餐豐且病歎宜
赤立士最盛而養最薄類亡具甚太守邢侯近至則曰
吾非不能急此而又有急於此者吾聞已丑之水校官
舍才甓不守而僦民屋以棲諸生知之乎謹曰然乃先
以楮四百五十緡爲學聽費而後以沒入田八十八畝
爲瞻學費又光孝寺私塗田千畝訟宿競未已復丐以
其半爲學需意懇懇矣夫重於教化而輕於簿書期會
知本也先於師之居而後於士之食知序也然以義理
而論則爲師者豈以居爲與美爲士者豈以食爲屬哉

哉爲政者自宜然爾宜然而不然者多矣侯迺能然則
幾矣吾學固多良士又遇賢師帥戴君槃岷隱端明之
猶子也問學既有源且能不言而躬匪怒以教所謂合
尊禮者於是乎在特所謂尊禮之道不止於新其居爾
求余記久未涉筆洎侯去益急曰吾不以其在否爲厯
情也賢也記合釐爲二遜謝曰願以田爲目而宅附見
焉不以已先衆也又賢也端平二年七月日記

州學增高塗田記

董亨復

儒宮之養養有用也佛氏之養養無用也有用之養常
薄無用之養常豐然佛非儒其能安坐而食乎佛旣無

用於世儒又有功於佛因彼之豐助吾之薄理亦宜爾
先是台之亡僧有新園高潮塗田前太守今尚書趙公
必願以其半與學篋窗記之矣報恩寺爭之不勝思以
計取陽爲租佃歲輸不能釐杪陰實據之旣郡委官履
之而周知其數爲田五百二十二畝有奇地已墾者一
百二十畝而縮未墾者二百四十畝而羸瀦水之所一
百三十七畝有半斯亦廣袤矣而塗之增者日未已也
然與養濟均分學不能專而有故僧捨臂於其間今太
守趙公因博士楊君點之請盡挈而歸之學別輟廩餼
以惠貧民然後學總其權而利入豐矣或曰有用無用